

四庫全書

集部

欽定四庫全書

集部  
雪樓集  
目錄  
卷一

詳校官中書臣羅錦森

侍讀臣孫球覆勘

總校官庶吉士臣朱鈐

校對官編修臣楊壽楠

謄錄監生臣鄒貽詩

欽定四庫全書

集部五

雪樓集目錄

別集類四元

卷一

玉堂類藁一

制詔

諭

冊文

祭文

齋意

青詞

祝文

卷二

玉堂類藁二

制詞

卷三

玉堂類藁三

制詞

卷四

玉堂類藁四

制詞

表

牋

致語

卷五

玉堂類藁五

敕賜碑

卷六

玉堂類藁六

敕賜碑

卷七

玉堂類藁七

敕賜碑

卷八

玉堂類藁八

敕賜碑

卷九

玉堂類藁九

敕賜碑

記

應制詩

贊

卷十

奏議存藁

卷十一

記

卷十二

記

卷十三

記

卷十四

序

引

卷十五

序

引

卷十六

碑銘

卷十七

碑銘

卷十八

碑銘

卷十九

碑銘

卷二十

碑銘

卷二十一

碑銘

卷二十二

碑銘

卷二十三

銘

箴

贊

說

祭文

祝文

書

啓

卷二十四

題跋

卷二十五

題跋

雜著

卷二十六

詩

卷二十七

詩

卷二十八

詩

卷二十九

詩

卷三十

詩

樂府

臣等謹案雪樓集三十卷元程鉅夫撰鉅夫  
初名文海以字行建昌人雪樓者郢州有白  
雪樓鉅夫嘗以名其寓故世即以是稱之鉅  
夫少與吳澄同學宋末從季父飛卿入元遂  
留宿衛世祖竒其才改授應奉翰林文字累  
官翰林學士承旨追封楚國公謚文憲事蹟  
具元史本傳鉅夫宏才博學被遇四朝忠亮  
鯁直為時名臣虞集嘗稱宋季士習卑陋以

時文相尚病其陳腐則以奇險相高江西尤甚鉅夫始以平易正大之學振文風作士氣元代古文之盛實自鉅夫創之蘇天爵元文類亦錄鉅夫古文十餘篇大抵皆制誥碑版紀功銘德之作而不及其詩蓋生平所注力者在此其順宗謚冊諸篇元史亦有取焉誠以廟堂制作溫厚典雅有合於訓誥遺風足為歐陽修王安石等嗣音固非南宋以來雕

鏤藻續者所可及也鉅夫所撰如玉堂類稿  
奏議存稿及詩文集雜著本各自為部其子  
大本合輯為四十五卷門人揭傒斯校正之  
此本併作三十卷乃至正癸卯其曾孫潛所  
重編刊校未竟至明洪武甲戌詔取其書入  
秘閣越明年始刊成之云乾隆四十五年五  
月恭校上

總纂官臣紀昀臣陸錫熊臣孫士毅

總校官臣陸費墀

雪樓集原序

聲音與政通文章與時高下原其始則理與氣合道與時合要其歸則亦泯然而無間三代而上醇乎醇者也漢猶近古其文則雄偉渾厚由其氣質未漓故其發為聲音者似之魏晉以降剝剖分裂作者厖乎不醇豈風氣乖而習弗善與至唐韓柳氏出起弊扶弱剷垢易新遂為後世作者之宗匠宋盛於前而靡於後金則無以議為也我國家以泰初混龐之氣開闢宇宙世祖皇帝合

南北為一家于斯之時人物之生辟猶春陽始達生意  
奮發甲者畢坼勾者畢出挺英揚蕤駢榮競秀條達暢  
茂滋息雨露而收其實者也公生於宋淳祐己酉當我  
憲宗嗣服前之二歲至至元丙子江南始平遂以侍子  
入見尋命入翰林年方壯也自始識學至於有立其所  
以儲精畜思藏器待時鬱而未施者固天所以遺聖明  
之世膺作興之運以恢宏大業黼黻太平者也公之文  
志本於仁義輔之以六經陳之為軌範措之為事業滔

滔汨汨如有源之水流而不窮曲折變化合自然之度  
愈出愈偉誠可謂一代之作者矣初世皇之在潛邸也  
已喜儒士凡天下之鴻才碩德靡不延訪招致左右爰  
暨即位乃考文章明制度興禮制樂為天下法一時名  
士彙征並進文采炳蔚度越前代如王文康公鷲王文  
忠公磐李文正公治太常徐公世隆內翰圖克坦公履之  
儔多前金遺逸皆為我用惟公南來際遇隆渥逮事四  
朝四十餘年雖出入顯要而居侍從之列者有半仕履

之久一人而已故其謨謀獻納輸忠盡職一寓之文古  
所謂立德立言而不朽者公其有焉今其存者內外制  
詞及諸雜文若干篇詩若干首樂府若干首摠四十五  
卷仲子大本之所錄也嗚呼盛哉公諱文海字鉅夫後  
避武宗御名以字行雪樓其號云至正十有四年歲在  
甲午四月生明前一日後學李好文謹序

欽定四庫全書

雪樓集卷一

元 程文海 撰

玉堂類藁

制詔 諭 冊文

命中書省從新整治制

朕自即位以來累降詔旨圖治惟勤績效未著蓋司民  
政者撫字乖方居風憲者彈劾失當不能副朕愛恤元  
元之意今命右丞相達爾罕左丞相阿固台中書省官

從新整治其布告天下凡在官守自今以始洗心易慮  
各盡乃職貪污敗政者責罰黜降廉勤公正治有成效  
者特加陞擢期於政化流行黎民安業共享和平之治  
合行事理條列于后

命左右相詔

至大元年七月

中書政本也軍國之務大小由之朕自即位以來厲精  
求治爰立輔相以總中書而期年于茲大效未著豈選  
用之不當歟何萬幾之猶紊而羣生之寔遂也今特命

左丞相塔斯布哈為中書右丞相太保竒塔特布濟克為中書左丞相統百官平庶政便者舉行弊者革去一新綜理諸內外合行大小事務並聽中書省區處聞奏違越者論罪於戲設官分職慎毋紊於條綱持盈守成務先安於黎庶

皇慶改元詔

至大四年九月

朕賴天地祖宗之靈纂承聖緒永惟治古之隆羣生成遂國以乂寧朕夙興夜寐不敢怠遑任賢使能興滯補

徹庶其臻茲斂時五福用敷錫厥庶民朕之志也踰年  
改元厥有異典其以至大五年為皇慶元年

延祐改元詔

正月丁未

惟天惟祖宗眷佑有國朕自即位于今四年比者陰陽  
失和星芒示儆豈朕躬脩德之未至歟抑官吏之未選  
而政令之或乖歟思以回天心召和氣側身脩行實切  
余衷庸勅攸司各共廼職爰布惟新之令誕敷濟衆之  
仁可改皇慶三年為延祐元年於戲以實應天爰聿新

於庶政用孚有衆同保合於太和

諭立魯齋書院

諭陝西行省行臺大小諸衙門官吏人等中書省奏御  
史臺言故中書左丞許衡首明理學尊為儒師世祖皇  
帝在潛邸嘗以禮徵至六盤山提舉陝右學校文風大  
行西臺侍御史趙世延請依他郡先賢過化之地為立  
書院前齊哩克琨總管王某獻地宅以成之延請前國子  
司業某同主領教生徒乞降旨撥田養士將王某量加

旌勸准奏可賜額曰魯齋書院仰所在官司量撥係官田土入學奉朔望春秋之祀修繕祠宇廩餼師生務在作養人材講習道義以備擢用從本路正官主領敦勸行省行臺常加勉勵其王某令有司別加旌表仍禁治過往使臣官員人等毋得在內停止褻瀆飲宴聚理詞訟造作工役應贍學產業書院公事毋得諸人侵擾彼或恃此為過作非寧不知懼

順宗皇帝上尊謚冊文

臣聞顯親所以為子追遠所以厚民矧必百世祀而位  
弗隆為天子父而養弗逮流光積慶爰集眇躬亦既踐  
阼而纘先猷是宜稱秩而躋廟祐以循彝典以達純誠  
欽惟皇考皇帝淵穆有容神明莫測文孫文子鍾至愛  
於兩宮宜君宜王膺具瞻於四海當璧之祥未卜棄屣  
之迹已遙興言欲報之恩昊天罔極對越有成之命夙  
夜惟寅昭哉玄德之升聖矣生知之異行莫行於昌後  
嗣而有天下孝莫孝於配前烈而茂本支念茲繼體之

初實切終身之慕謹遣攝太尉某奉冊寶上尊謚曰昭  
聖衍孝皇帝廟號順宗伏惟明明降監序于祖宗攸躋  
攸寧永錫祚胤謹言

皇后玉冊文

皇慶二年二月

皇帝若曰朕荷天地祖宗之佑皇太后之訓嗣大歷服  
思底于治必樹元配表正六宮咨爾翁吉喇特氏是我家  
世戚嫡嗣所自出積德流慶肆啓爾來嬪于朕淑慎孝  
恭令譽昭聞承命慈闈爰正爾位今遣攝太尉右丞相

圖固勒授爾玉冊玉寶命爾為皇后惟天地定位萬物  
以生日月並照萬國以明君后合德萬化以成上以事  
上帝承宗廟下以親九族正萬邦為朕內助惟爾之賢  
其永念厥德履中體順俾聖母暨予一人以寧匪惟爾  
嘉天亦永相念爾共享我有國欽哉

皇太后加上尊號玉冊文

維延祐三年歲次乙卯三月己酉朔越二十有二日庚  
午皇帝臣御名謹稽首再拜言臣聞正始之道王化之

基尚矣况母儀天下德厚功隆者哉欽惟儀天興聖慈  
仁昭懿壽元皇太后陛下開兩朝之帝業紹祖宗之正  
傳曠古所稀於斯為盛以臣涼菲鞠育教誨底于有成  
定神器而措諸安遏亂略而反之正不動聲色天下歸  
仁惟我聖母全德之致也自登大位八方謚清華夏蠻  
貊罔不率俾亦惟我聖母泰寧之應也日月星辰循其  
軌天地祖考降之祐九族既睦品物咸亨持盈守成臣  
何力焉亦惟我聖母福慶之積也然而治效方隆徽稱

未備宜益崇高之號允合天人之心是用參稽典禮惓  
惓懇懇謹奉玉冊玉寶加上尊號曰儀天興聖慈仁昭  
懿壽元全德泰寧福慶皇太后欽惟陛下得一以寧至  
靜而方慈儉為寶弗祿是康永錫祚肩俾熾俾昌受茲  
顯號萬壽無疆臣鉅夫誠懼誠抃稽首再拜謹言

祭文 齋意 青詞

皇太后遣使祭諸神文一十九首

后土 平陽路

坤靈承天子育萬有不基攸託元造以成念茲長樂之  
安居實自無疆之厚德爰伸信指少達純誠以報以祈  
永扶昌運

東岳泰山 泰安州

山岳之重尊岱為宗配天兆民國賴禔福端居長樂密  
藉洪休禮具報祈益昌祚膺

南岳衡山 潭州路

祝融紫蓋斜蔽天南清淑之靈無遠弗届 同上

西岳華山

華州

太華峙秀上司金天靈眈所加年豐物富

同上

北岳恒山

保定路曲陽縣

奠茲朔野仰止恒山凜然風威降佑作善

同上

中岳嵩山

河南府路

嵩神峻極天地之中兆祉發祥均于四表

同上

江瀆

成都府

川瀆共尊維江之永滔滔南紀澤及邇遐長樂安居實

永洪潤報祈魚舉流祚無疆

河瀆河中府

啓派自天界于中土睠言福澤端共靈長

同上

淮瀆唐州

桐栢之源實參名瀆格于幽顯惟神是司

同上

濟瀆懷孟路

導汎發祥源清行遠利澤之性潛顯無殊

同上

東海萊州

三神出沒百川朝宗朝陽既升景貺斯至安居長樂敢  
昧所原因報有祈永綿丕祚

南海 廣州

扶胥黃木厥有典文匪今斯今邦國徼福 同上

西海 河瀆附祭

虞淵汎濫水環神州涵佑蓄祥流光景命 同上

北海 濟瀆附祭

玄冥之壑鯤化之池是為靈淵皇圖式固 同上

東鎮沂山 登州

琅琊穹隆作鎮東夏蓄洩雲雨集于休祥長樂靜深敢  
忘鴻佑報祈備舉益羣丕基

南鎮會稽山 紹興路

夏后登封玉帛萬國靈光永祚今古攸同 同上

西鎮吳山 隴州

沂岐之間古稱吳岳金方巨鎮平秩西成 同上

北鎮醫巫閭山 高州

奕奕龍山有周已顯仰高錫厚永奠皇圖

同上

中鎮霍山

霍州

陰陽之交必有崇鎮蟠深錫鉅奠于土中

同上

翁郭察圖建宮殿祭文四首

太歲

伏以肇建皇居載安黼座仰歲君之鎮靜懼役事之震驚穆卜剛辰式陳明薦伏願京邑翼翼奠此八方四維  
福祿穰穰至于萬年億載

后土

伏以帝居肇造黼辰載安惟爾有神實司后土式伸昭告以格洪休伏願萬國來朝共仰京都之壯麗億年當宁永憑神力之護持

九良

伏以皇居肇造黼辰載安惟爾九良之神實司土木之柄輒陳菲薦用介繁禧伏願極正京畿來梯航於萬國尊瞻帝座保福祿於億年

安吻告諸神

伏以宮殿肇新始安螭吻神祇擁護用介鴻休穆卜剛  
辰式嚴祀事伏願梯航萬國仰京邑以來朝福祿億年  
保皇圖之永固

天壽節萬壽延真宮建醮道場文二首

齋意

伏以天申休命丕承積慶之基序屬孟秋適屆誕彌之  
旦念生成之有造薦蠲潔以達誠靈宇載嚴真遊所集

爰肅陳於淨醮祈上格於高穹伏願諸福來崇克彰於  
善應萬靈增固永保於無疆

青詞

伏以大道無言密啓乾嘉之運七月流火載符夙震之  
辰爰即琳宮肅陳清醮伏念丕圖全付涼德奚堪期迓  
續於天休必祇承於帝命蘋蘩蒞藻昭明德之惟馨上  
下神祇賴至誠之可動尚惟純佑俯賜鑒觀伏願祉錫  
眇躬保皇基之鞏固福隆太母介萬壽以怡愉嘉與羣

生同臻至治

又行宮建醮事道場文二首

齋意

伏以天啓皇圖用申休命時惟秋孟適屆誕彌謹於十  
七日命萬壽延真宮道士一壇就幄殿之次修建正一  
消災集慶清醮若干分位肅延飈馭敬演玄科伏願上  
帝垂慈衆真降監聖躬康泰享九州四海之隆平太母  
怡愉同億載萬年之長壽

青詞

伏以曰旦曰明密運監觀之造載震載夙適逢生育之  
期爰肅行宮恪陳清醮伏念皇圖至重帝命惟新顧夙  
夜之祇承若淵冰而求濟不言善應雖黍稷之非馨有  
感必通幸蘋蘩之可薦敬將誠意仰達高穹伏願申命  
用休保列聖太平之業介福于母奉萬年長樂之觴

上親祀太廟祝文

天鑒祖宗畀茲大寶盈成之會嗣守為難益以美名中

心怵惕潔齊薦見祇奉明禋啓佑無疆式臻康乂

長春宮建金籙醮道場文八首

齋意

伏以仰荷皇仁獲承大寶夙夜祇懼恐上拂於至和天  
地監臨矧升聞於涼德乃自去秋而後雨澤愆期復於  
暮春以來星芒示儆爰感陰陽之沴將為民物之災實  
深太后之驚疑益重眇躬之寅畏側身修省虔意禱祈  
謹命某官某道士於四月初五日就長春宮啓建上清

正一金籙清醮二千四百分位修崇道場七晝夜之科  
藏教至某日滿散蠲消既往之災迓續方來之慶伏願  
兩儀協序二氣致祥列星循度以安行諸福應誠而畢  
至風調雨順咸孚萬國之懽心時和歲豐永底慈闈之  
至養

風伯祝文

爰自去秋迄今春季時雨不降暴風頻興雲垂旒而屢  
褰澤雖下而未霑復覩乖曜于西維不勝恐懼之心

庸致禱禳之敬式稽金籙寅事琳宮惟神稟命帝廷實  
司風柄願作清塵之瑞大霽鳴條之威相齋事以圓成  
格天心之仁愛祆災潛掃膏澤下流清清泠泠俾四時  
之平秩熙熙皞皞遂萬物之生成

雨師祝文

去秋以來種不入土維春之暮星復示災謹稽金籙之  
科儀仰扣紫清而禳度賴神祇之交助庶肝鬲之潛通  
惟是明神實司雨澤願齋壇之清淨致上帝之監觀答

證俱消甘霖時若曰暘而暘曰雨而雨實維豐年為君  
盡君為臣盡臣式寬憂顧

建壇青詞

天惟善應顧感召之由人道本無方因祈禳而設教念  
陰陽之久否復星象之示愆祇即殊庭肅陳清醮巖事  
九朝之禮積誠七日之間建金籙之瑤壇啓琅函之玉  
字伏願齋忱上達帝監俯臨絕妖孽之萌芽災星退舍  
集福禧之潤澤甘雨應期下逮羣生悉資餘蔭

九朝青詞

飈馭降臨望清光而伊邇淵衷修省依道蔭以惟勤九  
肅朝儀載陳奏牘伏念惟皇作極理物代天顧雨澤之  
失期而星芒之示儆愆由眇已慮及羣生按金籙以修  
齋仰璇穹而請命冀闕蠲消之路幸垂仁愛之心伏願  
乾道清夷泰階正直庶徵各叙三光全而寒暑平六府  
孔修五穀熟而人民育永同壽母祇紹慶圖

三清青詞

道妙沖虛無方而善應天心仁愛有感而必通稽金籙  
以修齋望紫清而徼福伏念尊居人上職代天工自秋  
以來閔甘霖之闕澤迨春之暮驚祲侵之耀芒豈政令  
之失中抑膏澤之不下側身恐懼稽首祈禳伏願眷顧  
淵衷袪除沴氣五風十雨臻禹疇肅聖之時億載萬年  
奉文母怡愉之樂普資庶品同享太平

昊天青詞

眷命為君遇茲而懼見道知象有感則通稽首藥珠薦

誠蘋藻伏念位託臣民之上身膺歷數之歸自顧非涼  
未堪艱大不雨妨於東作有星孛于西維莫測其端豈  
無所自貢綠章而罪已回蒼昊之好生伏願下監齋忱  
潛消沴氣天其申命方開熙洽之期神之格思益介簡  
穰之祉

后土青詞

天高聽下本仁愛以為心地靜德方必順承之有道仰  
觀譴告俯切戰兢力祈上下之平成敬啓仙真而禳禴

伏念尊居五位望繫羣生方茲霂雨澤之來蘇俄復睹  
星文之謫見深求其故內省諸身豈政令之失宜致陰  
陽之為咎既騰章於蒼昊庸申告於鴻龐伏願六氣惟  
均庶土交正田耕井飲野闡擊壤之謠雨施雲行時若  
配天之澤

雪樓集卷一

欽定四庫全書

雪樓集卷二

元 程文海 撰

玉堂類藁

制詞

平章布拉吉達故曾祖父蘇布台贈効忠宣力  
佐命功臣太尉開府儀同三司上柱國公封  
河南郡王謚忠定制

龍虎風雲昔共基於鴻業河山帶礪今宜表於駿功矧

茲闕閱之崇亶有淵源之自具官某故曾祖父某夙彰  
孝勇妙蘊機權繇侍子而摠戎旃前無堅敵部降人而  
專帥馭出有勁兵為王前驅靡國不到汴水之恩波未  
竭牛關之妙算若神忠義傳家勲勞奕世生為柱國亦  
何愧於古人墓表征西更覺榮於異日宜超爵列并侈  
儀文昨以名邦錫之美謚蓋將為萬世之勸豈獨慰九  
京之恩於戲披荆棘以立朝廷既無忘於先烈聽鼓鼙  
而思將帥尤有望於後昆尚爾明靈服我休寵可

故曾祖母黃古台氏追封河南郡王夫人制

功成治定念股肱肇造之勞善積慶流亦伉儷相資之  
德爰從夫爵用表世勲具官某故曾祖母某氏稟專靖  
之姿作孝義之配兵間積苦回文無竇室之詩膝下承  
顏養志有姜妻之鯉故能悉心事主結髮從軍教忠實  
佐於興邦樹義允儀於中壺宜疏湯沐庶廣漏泉象設  
六珈廟食三室噫締構經營之匪易家國何殊良榮終  
始之所加閨房與及眷惟淑質歆此寵光可

故祖父烏蘭哈達贈推忠宣力定遠功臣太尉  
開府儀同三司上柱國追封河南郡王謚武

毅制

孝子慈孫之志身欲極於顯揚出將入相之家禮何嫌  
於隆盛顧茲節槩實貫幽明具官某故祖父某胄出名  
家光分列宿憲宗啓聖勤如博陸於昭宣世祖造邦功  
過淮陰於齊趙風披霆擊地闢天開方期文軌之同大  
紀旂常之美何滕城遽啓葛陣空存率其伐功幸哉遇

西平之有子嘉乃丕績悵然思李牧之用兵爰申異數  
之崇仍舉易名之典於戲西南七擒七縱山川尚識於  
旌旗君臣一德一心魂魄諒陪於弓劍庶幾英爽不昧  
寵光可

故祖母烏哩津氏追封河南郡王夫人制

嗟惟世臣厥有令婦能輔成其夫子以勸相我國家具  
官某故祖母某氏名族姬姜華姻秦晉介胄生蟣蝨殷  
雷之勸常聞圖像上麒麟雞鳴之戒有益而又克生名

嗣式配前人宜錫寵章以昭善慶爰正魚軒之秩仍開  
翟茀之封噫邦君妻曰夫人生雖弗及通侯子為丞相  
遠益有光可

左丞相某加太尉餘如故制

朕丕承先烈圖任世臣矧居上相之崇宜寄本兵之重  
具官某業傳忠孝德備剛柔弘濟多艱勛遠侷於周魯  
儀刑百辟時可致於唐虞乃瞻師垣尚勞邊境稽我祖  
宗之已試惟卿父子之克堪庸加掌武之階以佐修文

之治於戲循名責實朕方務於止戈論道經邦卿尚勤於補袞可

左丞相某加太尉餘如故制

惟軍國雖異容而文武非二道眷惟左輔實曰兼資具官某德器素闔聲華甚懋往丞執法臺閣生風晉侑秉鈞官僚承式材無施而不可功有位而乃成宜寓本兵以隆政柄於戲佐萬機之任深有賴於股肱折千里之衝諒不逾於尊俎可

故榮祿大夫江浙等處行中書省平章政事旺扎  
勒圖特贈効忠宣力定遠功臣開府儀同三  
司太尉上柱國追封林國公謚武宣制

三千同心祖宗所以致王業四百並建國家所以疇世  
勳矧予政路之良實爾義方之懿宜伸異數追獎純誠  
故具官某忠智而靜深雄毅而篤惠風雲不爽蚤參絳  
灌於頒行露雨並流迄繼甫申於藩翰方迓旬宣之績  
遽興殄瘁之嗟庚桑之祝非虛甘棠之詠益遠是用加

之顯號謚以令名爵超五等之崇秩視三公之重既端  
兵本仍位國楨匪惟漏澤於九京抑以勸功於百執噫  
漢文之思李牧恨不同時周穆之命君牙庶其率考英  
魂如在茂渥其承可

故妻某氏追封林國夫人制

祥開鶻印已彰忠孝之全詠著雞鳴尤美貞賢之助盍  
伸湯沐追命烝嘗故具官某故妻某氏名閼姬姜能臣  
伉儷蚤播宜室家之譽常懷閼君子之心尚以瓊瑩儼

德容之有素玘兮象掃稱命服之甚華猶需列爵之榮  
乃止小君之位茲仰卹典俯慰永懷噫五鼎萬鍾木欲  
靜而風不止三槐九棘源之深者流必長嗟爾淑靈歆  
予懿澤可

參議中書省事賈鈞父中奉大夫江西等處行  
中書省參知政事居貞特贈推忠輔義功臣  
銀青榮祿大夫平章政事追封定國公謚文  
正制

同心同德時允賴於經綸懋賞懋官禮必兼於崇報粵  
我祖宗之謨烈孰為左右之忠良

闕

具官賈某故父某官某材足以開物成務行足以範世  
格民奮繇閱閱之英出佐風雲之盛嘉猷則告於內自  
結主知非道不陳于前有裨聖學仁言甚溥介節彌堅  
肆文武之兼資當中外之重寄籌帷幄則舉無遺策維  
藩屏則隱若長城民歌賈父之晚來國美召公之日闕  
方南行而膏陰雨倏上騎而比列星茲惟圖任之新緬

念老成之逝是用酬庸錫號節惠易名啓山礪河帶之  
書晉青綬銀章之秩仍登宰路下賁玄墟庶幾少極於  
哀榮于以具隆於幽顯噫畢公之亮四世慨弗逮於仰  
成申伯之採萬邦尚遙觀於濟美顧惟英爽不昧寵光  
可

故母李氏追封定國夫人制

慎終追遠栝棧之澤猶存崇德報功湯沐之恩不廢矧  
名臣之齊體宜寵數之稱情具官賈某故母李氏琬琰

內彰筭筭素習柔嘉維則蚤婉美於姬姜儆戒相成寢  
陞華於將相懿彼閭中之範宛其林下之風乃瞻象賢  
足占裕慶茲用追榮石窳申錫泉局慰報本之深思勵  
教忠之大義以光窳窳以重烝嘗噫生也有涯雖未竟  
六珈之飾没而不朽庶其安五鼎之歆可

特進平章政事嘉琿特加開府儀同三司太子

太保太尉平章軍國重事上柱國封魏國公

制

元良毓德羽翼之寄匪輕丞弼均勞股肱之義無間肆  
予邇列亶有世臣宜兼命數之隆式示眷懷之渥具官  
某忠勤而明濟侃直而惠和由閔闕之茂勳為邦家之  
偉器薦更中外練達古今屬當代邸之迎功參平勃繼  
預漢廷之拜位次蕭曹方有賴於協恭豈遽宜於勇退  
茲用進登亞傅光輔前星兵民之要務是咨祖禰之名  
封并紹申階掌武仍視秉鈞蔚居柱石之間雍容廊廟  
之上於戲入承儲極保身體者望之深出侑政機關軍

國者任之重益充令譽佇俟嘉猷可

特進平章嘉琿故曾祖父達吉斯特贈効忠翊  
運保德功臣開府儀同三司太傅上柱國追  
封魏國公謚康懿制

報功王者之令典顯親人子之至情矧世篤於忠貞宜  
上尋其淵懿爰加贈錫以極褒崇具官某故曾祖父某  
涼土竒材金方間氣功名著代未應謝艾之可專器識  
絕倫豈獨韋宗之所覩睠惟良嗣入作蓋臣迄流慶於

孫曾實有光於家國茲用指魏邦而啓宇遵周法以易名六字表功三能開府願遺榮之甚腆非盛德其孰堪於戲七世侍中蓋不墜日碑之訓四朝元老又安知長樂之誇英爽故存欽承毋怠可

故曾祖母梁氏追封魏國夫人制

齊夫人三初未聞於王命漢侍中七世共美於家風瞻我臣工揚其祖禰伉儷之重褒卹是宜具官某故曾祖母梁氏西方之美人東漢之舊族君子偕老相大國而

顯諸侯天下復平居北堂而稱命婦賞既延於後嗣位  
蓋正於小君蓋考德必論其世者欲浚忠厚之源列爵  
必從其夫者以著貞順之効茲為懿澤尚賁幽局可

故祖父錫哩特贈推忠佐命宣力功臣開府儀

同三司太師上柱國追封魏國公謚貞獻制

雲臺烟閣居多故國之臣玉闕金城代有良家之子世  
雖殊而事不異功若舊而報則新具官某故祖父某胄  
出相門身逢聖運竇融朝漢義固取於尊王由余入秦

功不逾於定霸執若攀龍而附鳳訖觀歸馬而放牛蔚  
為將帥之良兼寄兵民之重光輔五朝之弓劍弘開萬  
里之版圖垂裕本支流芳簡冊是用表勛作謚建府經  
邦仍申胙於大名俾從歆於顯考備于追飾慰此遺忠  
噫始賞而復公侯事信有超於往牒受祉而施孫子靈  
其不昧於寵章可

故祖母田氏追封魏國夫人制

因親以顯親大父之功已報無爵而從爵小君之號宜

加典禮是常哀榮斯至具官某故祖母田氏毓珍令邃  
主饋高華諒每戒於懷安故首明於歸往聿致登壇之  
拜終膺胙土之恩為室家之道其義豐為子孫之謀其  
効遠足光內則盍列世封噫五檠詩存無復平生之閔  
六珈儀盛猶當永世之傳歆此明綸安于顯祐可

故父資德大夫雲南等處行中書省右丞贈銀

青榮祿大夫平章政事謚毅敏阿魯加贈秉

忠執義威遠功臣開府儀同三司太師上柱

國追封魏國公改謚忠節制

社金革而不厭勁氣猶生聞鼓輦而興思遺忠可錄矧  
此岩廊之彥乃其堂構之良宜洵追崇用垂廣勸具官  
某故父某官贈某官某堪輿偉器閱名流耿上谷之  
有奔克當父任李西平之得愬足紹家門七縱七擒百  
戰百勝威懾羌髳之外境踰秦漢之先籌畧無遺旬宣  
不廢顧王旅甫臨於交趾而將軍乃病於壺頭遂致其  
身式開厥後茲用增封大國進列上公號以顯庸謚以

協行表邦家之八柱視宰路之多儀祖禰均恩閭門與  
慶匪獨榮其幽壤抑以視於昕朝噫保乂王家永念為  
臣之不二光昭令德亦惟有子之能賢寵秩有章歆嘉  
無數可

故母王氏追封魏國夫人制

積行累功爰致上公之位抗尊齊體宜從大國之封用  
行殊榮式綿遐慶具官某故母王氏清心玉映淑德蘭  
芳彤史增華內則素宜於家室綏章延寵中權獲展於

邊陲克相令終俱膺燕譽彞鼎之刊不泯庭階之祚未  
央衮繡有嚴禕禴斯稱以申夙夜儆戒之勸以慰雨露  
悽愴之懷噫侯母通籍禁中惜徒存於舊典將軍題碑  
墓上庶共享於榮名可

榮祿大夫遙授平章政事中政使翰林學士承  
旨兼修國史三寶努特授金紫光祿大夫上  
柱國遙授中書左丞相封蒲國公餘如故制  
篤近舉遠盖有國之弘規崇德象賢乃為臣之盛美雖

已班於宰路猶未究於寵章洵錫殊榮於昭異眷具官  
某名家令器治世通材知無不為將順之忠夙著行思  
可樂顯揚之孝彌彰肆予臨御之初與有翊扶之績爰  
躋邇列仍長禁林念旦夕承辟之孔勤信夙夜在公而  
無忝克循先烈豈謂世勞用啓誓於山河併申名於柱  
石服茲新命踐厥舊官於戲日碑之侍漢宮遂流芳於  
七葉伯同之為周正因託譽於百篇罔俾前修獨專往  
牒可

張氏第二代嗣師封正一嗣師太清演教妙道

真君制

蓋聞古先哲王莫不以清靜寧民為本公孫有大隗之  
訪陶唐有赤水之往所以博求至理在宥天下也朕甚  
慕之張氏正一之教其幾是乎今有司以嗣師位號為  
請惟師嗣守道器遺榮冲引尚安所事名然繼宗開緒  
納俗安善之迹不可弗表也宜有顯稱以致遐仰可

張氏第三代系師封正一系師太清昭化廣德

真君制

道之大原出於天而成之在人。有漢天師之緒遠矣。微其子孫善世善承不怠。益大孰濟。登茲是以代有異人。出禪治化。朕既加號於嗣師而系師景行。焯靈昭于簡冊。渺然自拔。功成不居。經不云乎。上德不德。是以有德可

資德大夫中書左丞劉正故祖父聚贈資德大夫中書右丞追封清國公謚昭懿制

惟祖宗之於子孫猶水木之有源本末之茂者本必大流之深者源必長曷予近弼之忠良亶自前人之積累其官劉某故祖父某重珪疊組之名裔三百餘年之故家當世未夷含章不耀居家理而宗族稱其孝與人善而鄉黨服其仁積是慶餘克昌厥後迨其孫而始大盡為臣之匪躬法度森嚴而臺閣風生政事廉平而聲譽日著朕博詢於輿論俾佐秉於國成嘉乃賢勞推其所自是用晉登宰路陞錫崇階開大國之新封稽易名之

舊典以光幽壤以示昕朝於戲忠孝以事其君尚不負  
傳家之託公侯必復其始庶幾發潛德之光顧爾英靈  
服我休命可

故祖母何氏追封清國夫人制

夫有克家之婦教子以施于孫國推追遠之恩尊祖以  
及其妣眷予丞弼錫以寵褒具官劉某故祖母何氏慈  
孝著于閨門勤儉刑于宗族卿慙於長嗟家世之中微  
徵後有暮幸公侯之始復雪涕指墓碑而激厲延師資

經訓之留奮迨至成人遂登膺仕朕既獲忠良之用茲  
不忘教養之功惜哉賫志於重泉予以追榮於愍冊啓  
封大國正位小君於戲生也有涯雖未究六珈之飾沒  
而不朽庶幾安五鼎之歆尚爾有靈服我休命可

故父忠贈榮祿大夫大司徒追封清國公謚簡

穆制

立身揚名以顯父母者人子之大孝昭天漏泉以為恩  
澤者國家之至仁眷予丞弼之賢亶有淵源之自具官

劉某故父某躬服道義譽聞家邦不卑小官嘗為祿仕  
厭塵市錐刀之污下效孟氏之三遷念祖宗門戶之高  
華慕燕山之教子維天福善為朕得人凡中書政本之  
良皆平日義方之懿子欲養而親不逮身雖沒而名則  
彰是用陞錫崇階晉司邦教啓大封而賜履節壹惠以  
易名庶極哀榮具隆幽顯於戲家聲益大始賞而復公  
侯遺澤無窮受祉以施孫子顧惟英爽不昧寵光可

故母孫氏追封清國夫人制

母貴以子爵從其夫錄善追榮已致上公之位抗尊齊  
體宜膺大國之封用衍殊恩以勸有位具官劉某故母  
孫氏毓芳名族主饋高閨賓祭恪恭內則可儀於九族  
閨門雍肅家人知有於嚴君勤儉以相其夫詩禮以訓  
其子使朕獲忠良之佐而國資經濟之才惜不迨祿養  
於庭闈是用錫寵光於泉壤爰正小君之號以慰純孝  
之心於戲五鼎萬鍾木欲靜而風不止三槐九棘源之  
深者流必長尚爾淑靈歆予茂渥可

中奉大夫中書參知政事額卜德呼勒故曾祖  
父們色勒喇卜丹贈昭文館大學士資德大  
夫追封吉國公謚忠懿制

士懷忠義雖百世以如生澤及子孫乃積善之餘慶  
予輔弼豈有淵源具官某故曾祖父某以間世之才得  
不傳之學九州之外五經之表固自有人三辰之運六  
氣之行如指諸掌知白旄黃鉞之顯西土率簞食壺漿  
以迎王師舉父子以偕來至孫曾而方大是用崇階進

秩文館陞華胙以名邦錫之美謚匪獨榮其幽壤抑以示於昕朝於戲德閭而章所以慰烝嘗之怵惕世濟其美庶幾增門戶之光華其服殊恩以康乃後可

故曾祖母巴特瑪氏追封吉國夫人制

言不出閫蓋婦道止於幽閒沒而揚名待子孫而後貴顯睦良臣而論世宜卹典之追榮具官某故曾祖母某氏範正閨闈德宜家室知儆戒相成之道每懼懷安當艱難共濟之時首明歸往慶延後嗣職代天工被之象

服以是宜豈曰祿養之不逮於戲德惟邁種故取實於  
既熟之餘福至如川其養源於初發之後服茲命數佑  
爾雲來可

故祖父北京路穆呼哩烏齊爾巴咱爾羅丹前贈  
推誠宣力功臣光祿大夫平章政事追封吉  
國公謚明襄制

天生賢佐弼予一人國有寵章迨其三世式彰孝治載  
在贊書具官某故祖父某官某卓爾竒才生於絕域父

子為師友在家蓋有異聞學術貫天人中國若合一契於草昧而知天命奮節義以迎王師仕歷累朝慶延後嗣是用疇庸錫號節惠易名封肇啓於名邦秩仍崇於宰路載隆典禮備極哀榮於戲逝不可追者親揚名以顯德何以加於孝事君則忠迪爾後人歆予成命可

故祖母呼巴氏追封吉國夫人制

賢者有後由子以施于孫國之至仁尊祖以及其妣以隆輔弼以勸臣工具官某故祖母某氏淑慎其儀柔嘉

維則恭儉而中禮富貴而不驕儆戒相成有以相其夫  
子弟祿是荷用垂裕於後昆慨逝者之如斯嘉芳名之  
不朽是用疏封大國漏澤九原豈特以慰其家蓋將使  
顯于世於戲哀榮備矣庶幾全追遠之恩雲仍保之則  
亦有無窮之聞顧惟不昧歆此寵章可

故父翰林學士承旨正奉大夫伊卜德噶羅丹  
贈推誠守正功臣金紫光祿大夫大司徒柱  
國追封吉國公謚忠簡制

惟世祖皇建有極而衆賢聚在本朝左右輔弼罔匪止  
人先後奔走亦多吉士至於天人祕奧之絕學皆其家  
世授受之真傳及臨事而有為顧無施而不可永懷舊  
德默契予衷具官某故父某官某剛毅而惠和廣博而  
精粹在階庭為良子弟學術可以名家在朝廷號賢公  
卿中外稱其善政晚以耆老久侍禁林嗟哲人之云萎  
幸良嗣之克肖是用易名旌善錫號表勲啓山礪河帶  
之書晉紫綬金章之秩仍掌邦教以光玄墟於戲不朽

者名雖死之年猶生之日欲報之德移子之孝為臣之忠英靈如存寵光不替可

母咱納克布氏封吉國太夫人制

母以子而貴臣以孝為忠然令名壽考人不能兼而祿養逮親古所罕見日侍慈顏之燕喜予嘉政府之純臣具官某母某氏毓秀高華持身法度言動不踰於閭闔賓祭必備於情文勤儉以相其夫故夙夜在公而忘其家事詩禮以訓其子故廉慎律已而保其令名盡婦道

而盡母儀宜家人而宜後嗣肆朕得忠良之助其可忘  
教育之勤是用正位小君疏封大國于以著克家之美  
于以彰錫類之仁於戲象服六珈儀可為於內則黃髮  
千歲養永就於南陔茂對寵光以綏壽祉可

榮祿大夫遙授平章政事商議中書省事太子

詹事衛率使何瑋故祖父淵贈推誠宣力功  
臣銀青榮祿大夫大司徒追封易國公謚武

宣制

積功累行以忠厚而起家  
泐流遡源施恩澤而追遠疇  
若予采詒厥孫謀具官何某  
故祖父某昔守鄉邦宅心  
惠政全民保境載父老之口  
碑立身揚名見子孫於身  
後慰其幽壤我有寵章於戲  
取實於既熟之餘德可忘  
於邁種養源於方發之始福  
之至也如川迪爾後人歆  
予休命可

故祖母鄧氏追封易國夫人制

惟天福善積慶以興其家有國報功尊祖以及其妣予

嘉忠蓋厥有淵源具官何某故祖母鄧氏出自名門嬪  
于右族懿範隆於閨閭義方篤於家庭有子能賢既沒  
身於王事及孫而大克盡道於帝臣式啓國封俾從夫  
爵于以光於幽壤予以勸於明廷於戲在邦在家聞達  
本無於二道惟忠惟孝死生俱享於今名其服殊恩以  
康乃後可

故父易州等處行軍千戶兼軍民總管伯祥贈  
推忠保節功臣儀同三司太保上柱國追封

易國公謚忠毅制

盡忠之士雖死如生積善之家其後必大眷此岩廊之  
彥乃其堂構之良爰遡慶源肆頒愍冊具官何某故父  
某官某雄毅而明敏忠智而清深粵從總角之年早已  
脫穎而出從其父而犯不可測之敵忠所事而復不共  
戴之讎衆推將帥之才身際風雲之會燕南陞趙北際  
固自有人金先滅宋後亡俱嘗戮力謀屈羣策勇冠三  
軍攻城每拔柵以先登臨戰嘗畏創而出陳方王旅欲

吞於江漢而將軍乃病於壺頭莫贖其身式開厥後爰  
舉褒崇之典仍兼命數之隆節惠易名建邦啓土載加  
爵秩備極哀榮豈但以慰其家蓋將使顯于世於戲北  
風易水嗟壯士之不還黃河泰山暨汝封而長在英靈  
不泯寵命其承可

故母楊氏追封易國夫人制

興家必有令婦錫爵則從其夫矧在位之忠良實積慶  
之垂裕寵疏湯沐光賁泉局具官何某故母楊氏名閔

姬姜能臣伉儷清儉以立門戶勤勞以濟艱難利家人  
夫婦之貞內則素嚴於閨閫閔君子車甲之盛中權獲  
展於邊陲其身嗟夢幻之幾何遺澤幸階庭之益行是  
用肇封大國正位小君以慰霜露悽愴之懷以申夙夜  
儆戒之勸於戲侯母通禁中之籍舊典徒存將軍題墓  
上之碑榮名與享服我休命迪爾後人可

故母郭氏追封易國夫人制

功成治定念股肱宣力之勞善積慶流亦伉儷得賢之

助爰從夫爵用表世勳具官何某故母郭氏貞淑範於  
閨闈慈孝聞於媼族閔其夫子永歌五稜之詩教以義  
方遠慕三遷之懿眷惟良嗣作我蓋臣端由內則之賢  
盍正小君之位以光窀穸以重烝嘗於戲副筭六珈嗟  
死生之契闊雲仍百世尚福澤之便蕃顧爾淑靈服我  
休命可

母葉氏封易國太夫人制

子之祿逮其親揚名以顯朕以孝治天下錫類有恩惟

元臣之忠良皆母氏之聖善將以成其家慶肆肇啓於國封其官何某母葉氏淑慎其儀柔嘉維則雖被服之感不與君子而偕老而正位乎內允協家人之利貞維以永年幸哉有子直言正論出而揚蹇蹇之風愉色婉容入則奉融融之樂教忠有自寵錫是宜貴以象服翟車榮其黃髮兒齒於戲南陔所以美孝子乃風化之表儀北堂稱曰太夫人亦邦家之光耀永綏壽祉茂對休嘉可

榮祿大夫大司徒知太常禮儀院事田忠良故  
曾祖父嗣叔贈昭文館大學士中奉大夫追  
封趙國公謚忠毅制

求忠臣必於孝子厥有本原啓大國而為諸侯及于祖  
禰斯惟懋賞以待殊勛具官田某故曾祖父某泰而不  
驕仁者有勇事親以禮心勦形瘞於湯藥之間與物為  
春近悅遠來於干戈之際允能安集仍識依歸矧死事  
之蹟未忘而作善之祥有在追加異數庸答遺忠於戲

衽服叢臺初誓山河之礪帶圖形烟閣益綿家世之軒  
裳遐想幽貞尚知明命可

故曾祖母曹氏追封趙國夫人制

六世同居義蓋由於中饋一門俱顯禮必及於從封爰  
布明綸俾躋列土具官田某故曾祖母曹氏心存孝敬  
訓著柔嘉人無間言骨肉之情甚懿事資內助里閭之  
感益深卒為開國之臣是曰宜家之婦冠于族黨慶在  
子孫用茲湯沐之頒相彼烝嘗之祀於戲佩其象掃雖

已厚於平生申以丹書尚有光於永世可

故祖父子成贈資德大夫尚書左丞追封趙國

公謚武康制

溯淵源而論德相望百年崇班爵以報功是為再世以  
推念祖以勵立身具官田某故祖父某爵為時英凜有  
將略此父此子因心之孝則同為國為民仁言之利已  
溥乃若出奇而清州里決策以嚮朝廷臨財能廉敵愾  
甚勇方近鷹揚之用聿興豹隱之思遠邇相從湛浮自

得蓋遺榮於晚節以垂裕於後昆茲用指趙分封遵周  
作謚官列羣公之次秩超九命之華褒卹有知情文斯  
稱於戲長弓大箭莫圖汗馬之勞赤舄衮衣已極為臣  
之貴往歆茂典益衍慶源可

故祖母陳氏追封趙國夫人制

恩紀旁流婦人從夫之爵榮名上及臣子尊祖之情宜  
昇絲綸以光簋簋具官田某故祖母陳氏躬有淑德嬪  
于義門婉婉聽從之無違儆戒相成之不忘先人後已

為矜式於中閨睦族宜家襲儀刑于前轍卒啓孫枝之  
盛蓋齊公衮之尊用舉彛章俾訓永慕於戲龍旂承祀  
想欣朱紫之森羅翟芾以朝猶有丹青之彷彿可

父潤授光祿大夫大司徒封趙國公制

有學名家父以是傳之子惟天福善祿所以逮其親自  
昔所難於今為盛式隆孝治載在贊書具官田某父某  
識洞貫於天人譽蚤聞於朝野結知世祖言如響之應  
聲辭爵天朝身自量而甚準謂有生之定數蓋取壽而

舍名維以永年幸哉有子肆朕龍飛之始備殫翼戴之誠信有心傳灼知天命是用仍封鄉國晉陟地官既以勵於教忠亦以資於養志於戲馭臣之柄在爵祿朕不敢私老成於國為著龜爾尚無隱益綏壽祉祇服寵章可

故母吳氏追封趙國夫人制

母貴以子爵從其夫雖未嘗逮祿養於生前豈不可追榮名於身後具官田某故母吳氏毓芳名閨主饋高閔

宜室家而夫婦利貞事舅姑而媯族稱孝慶延後嗣名列忠臣屬當臨御之時備著翊扶之績父榮封國慶壽袞之方開母實抗尊悵慈顏之已遠爰正小君之號以慰九原之思於戲其生也榮其死也哀允為殊遇事君以忠事親以孝是在後人可

雪樓集卷二

欽定四庫全書

集部

雪樓集卷四

三

詳校官中書臣羅錦森

侍讀臣孫球覆勘

總校官庶吉士臣朱鈐

校對官編修臣楊壽楠

謄錄監生臣鄒貽詩

欽定四庫全書

雪樓集卷三

元程文海撰

玉堂類藁

制詞

故平章政事薩里贈推忠守正佐理功臣太傅

開府儀同三司上柱國追封徐國公謚忠肅

制

紹筑水之封益仰思於基構列雲臺之像亦追念於股

肱惟茲世勞在昔先正有美忠嘉之克肖眷言褒卹之  
是宜故具官某惇大而直方剛毅而廉潔以閎閱之胄  
而加之博學以鼎俎之器而濟之純誠獨發奸謀異回  
淵聽譴不辭於九死刑迄正於四凶文祖知其匪躬具  
臣為之愧色乃若旬宣之績暨夫綏定之勛惠洽閭閻  
恩加庠序剗煩治劇而事皆可法興利除害而知無不  
為兼衆循吏之所僅能有古名將之所不逮家無餘積  
塗有公言方觀長孺之在朝人皆知憚緬篋立成之正

已天不慙遺茲用昨以徐方躋于周傳表功錫號節惠  
易名視台宰之多儀籙邦家之八柱昭予令典慰爾遺  
忠於戲華屋山丘深起思賢之詠白雲弓劍諒深扈聖  
之勤尚敷遺於後人益對揚於休命可

故妻鴻和納哩罕氏追封徐國夫人制

積行累功之盛爰致公封匹尊齊體之賢宜從夫爵匪  
獨光其家祭抑以煥於國章故具官某故妻某氏毓自  
名家嬪于貴族雞鳴著詠知婦德之無違鷓峙在庭昭

母儀之有素云何不淑蚤爾長歸追封湯沐之恩俯慰  
枯槁之感於戲禕衣闕翟空留服飾於丹青石室金滕  
尚繼勲名於帶礪諒惟懿識不昧欽承可

妻宗氏封徐國太夫人制

錫之山川既追崇於大國宜其家室亦正位於小君以  
勵忠臣以彰孝治故具官某妻宗氏清心玉映淑德蘭  
馨相饋祀於高華所期偕老撫遺孤於艱棘乃曰未亡  
後嗣賴以有成名閥因之不墜盍佐北堂之養俾從東

土之封於戲膏沐誰容寧慕六珈之盛飾風猷未遠庶  
幾二惠之能賢其服殊思益修內訓可

丞相托克托故曾祖父固都斯追封某王制

家國同休表生平之為善淵源遠被宜奕世之流芳粵  
若孫曾為吾丞弼爰推恩於欲報兼示眷於具瞻具官  
某故曾祖父某稟間氣於兩儀之間稱竒材於六合之  
表風流譽處雖梗槩之無傳閱聲名尚光華而有耀  
克昌厥後以迄于今用追遜於多儀并申榮於三世以

昭令德以迪遠猷於戲貴震一方故國之風雲已矣爵  
超五等中天之雨露湛然英爽未渝欽承無怠可

故曾祖母某氏

積善降祥於子孫而益著報功崇德雖伉儷而必偕用  
稱情文亦彰孝治具官某故曾祖母某氏相中閨於裔  
土婦禮無違啓後嗣於清時家門未慙譽齊三鳳功協  
一夔用沿開國之封追畀從夫之爵於戲周禮下王后  
一等當知在昔之匪輕蕭氏有丞相八人彌覺於今之

為盛柔嘉如在懿惠其承可

故祖父且錫勒

加恩泉壤有國所以勸功尚論本原後嗣於焉濟美榮  
其大父慰我元臣具官某故祖父某世載賢稱親逢聖  
作會孟津者八百咸秉盛心列要服于五千悉歸至治  
乃風猷之弗替而聲教之所漸代有其人不忝厥祖瞻  
在廷之三俊實承祀之諸孫宜極追崇用昭眷倚於戲  
王公皆爵孰如君命之榮伯仲能賢佇見家聲之振肆

惟幽哲歆此殊章可

故祖母某氏

翟第以朝莫起小君於窀窆龍旂承祀宜從大父於烝  
嘗用勸造邦亦嘉尊祖具官某故祖母某氏以名門之  
懿淑為令婦之表儀慶集子孫國賴棟梁之助恩均昭  
穆家傳帶礪之盟再命所加九京斯顯於戲坐間銀鹿  
諒知終列於王官肘後金章惜不及觀於相印永惟柔  
識尚服明綸可

故父雅雅

同心同德事不間於古今懋賞懋官誼無分於存歿  
此贊襄之彥資其揚顯之心具官某故父某惇厚有聞  
忠貞弗懈日殫歸漢胄本出於王家伯同事周職莫親  
於僕正執干戈而衛社負羈縲以從君勲在五朝勤非  
一日用啓承家之慶仍居佐命之功冒九死而不可回  
挺然臣節佐萬機而能有守簡在朕心觀俊宅之盡忠  
見義方之善教爰推罔極追錫有章於戲四世五公掩

前聞而獨盛一門三戟喜同氣之相輝尚顧寵綏益安  
顯祀可

母歡台氏封康國太夫人制

來章有慶肇開西土之封壽考維祺方受北堂之養從  
頒湯沐俾侑旨甘具官某母某氏名世高門宜家令配  
蚤資內助五朝之翼亮無違晚節母儀三季之忠勤有  
自光分鼎席譽益槐庭肆予孝治之時副爾顯親之志  
於戲通侯子為丞相昔列遷書邦君妻曰夫人今昌魯

語嘉承茂渥益介期頤可

故榮祿大夫河南江北等處行中書省平章政  
事何瑋贈推忠佐理同德功臣太傅開府儀  
同三司上柱國追封梁國公謚文正制

允文允武遽興殄瘁之嗟懋賞懋官庸舉報崇之典故  
具官何某家傳忠孝德備柔剛事軍旅而敦詩書生閱  
閱而習政務踐駁臺省憚汲黯之在廷勤勩蕃宣式樊  
侯之維翰教興庠序惠洽閭閻論事後成敗國之著龜

以身佩安危朝之柱石朕方求助天不憖遺茲用昨以  
召棠躋于周傳表功錫號節惠易名視台宰之多儀邁  
邦家之八柱昭予異眷慰爾遺忠於戲華屋山丘深思  
賢於既往丹書帶礪應濟美於方來爾其顧歆是為不  
朽可

故妻張氏追封梁國夫人制

錫之山川既追榮於先正宜其家室亦有位於小君以  
彰國恩以勵臣節故具官何瑋故妻張氏誕生名閼來

嬪高閔淑慎其身既百年之偕老柔嘉維則將永世以  
流芳爰錫絲綸從封湯沐於戲正位乎內雖死之日猶  
生之年在後之人行己也恭事上也敬尚惟不昧服我  
異恩可

趙王專故曾祖父已推爾罕贈宣忠協力翊衛  
果毅功臣太傅開府儀同三司上柱國駙馬  
都尉追封趙王謚武毅制

古今天義莫重君君而臣臣國家異恩豈但親親而貴

貴賤予懿戚代有偉人自其祖之匪躬至于今而五世  
忠勤益著典禮宜崇某王某故曾祖父某胄出名門身  
逢聖運年方韶齔從太祖以西征約結婚姻尚帝姬而  
敦好累建開疆之偉績遂為佐命之元勳迄流慶於孫  
曾亶有光於竹帛茲用贈之周傅王此趙邦邁八柱以  
承天列三能而開府表功錫號節惠易名於戲爵至於  
王甚盛茂以加矣世濟其美爾祖其與享之毋忘寵章  
是在後嗣可

故曾祖母齊國大長公主阿老罕布濟克追封皇  
高祖姑趙國大長公主制

肇造興邦賴臣子翼扶之力相成有道實皇家肺腑之  
親褒卹宜崇哀榮斯至某王某故曾祖母某神明毓粹  
智畧超凡決勝運籌凜有丈夫之風烈起家裕後聿開  
戚畹之王封為室家之道其義豐為子孫之謀其效遠  
追惟懿行盍昨大邦用衍絲綸有光窀穸於戲丕謨丕  
烈予亦念於前人維孝維忠爾尚佑于後嗣諒存英爽

不昧欽承可

故祖父阿爾布哈贈懷忠竭力效勇定遠功臣太  
師開府儀同三司上柱國駙馬都尉追封趙

王謚武襄制

盡忠効節閔予戚里之賢沿流溯源嘉乃世臣之後誕  
揚恤典載在贊書某王某故祖父某以太祖之外孫尚  
世皇之季主富貴固其素有居上不驕智勇可謂兼全  
遇戰則克是以生名家之子迄能為死節之臣丕顯其

先式開厥後是用遷封大國峻秩上公錫號表勲易名  
叶行旌邦家之一柱視宰路之多儀以發幽光以隆孝  
祀於戲九京可作賴有不朽者存奕世其昌保此無窮  
之間英魂如在茂渥其承可

故祖母伊埒追封皇祖姑趙國大長公主制

於惟帝姬下嬪世戚雖生於宮掖車服不繫其夫而施  
于子孫家國俱賴其助肆敷愍冊式慰孝思某王某故  
祖母某穠矣棣華粹然玉質在室不煩於姆訓為婦克

盡於壹儀始自正家咸詠肅雝之德居然生子聿為節  
義之臣是用追啓新封建遷大國於戲若稽卹典名位  
何以復加垂裕後昆富貴所以長守尚惟不昧歆此殊  
恩可

丞相持穆岱爾故曾祖父蘇海贈翊運宣力保  
大功臣太尉開府儀同三司上柱國追封歸  
德王謚武烈制

水注而為江河其發源也必遠木大而為梁棟其植本

也必深積盛德於百年嘉元臣之三世惟有是似曰篤  
不忘具官某故曾祖父某從太祖之肇基為元勳而佐  
命金甲凋戈而親行陣筭路藍縷以啓山林如霆如雷  
張六師之聲燄于疆于理開萬里之版圖聞鼓鞀而興  
懷幸孫曾之濟美茲用分茅以胙超爵而王儀既視於  
秉鈞階仍升於掌武表功柱國定謚易名誕錫殊恩遠  
彰前烈於戲有餘之慶始賞而復公侯不朽者存受祉  
以施孫子顧惟英爽不昧欽承可

故曾祖母伊蘇衮氏追封歸德王夫人制

錄善追榮既封王而裂土抗尊齊體宜錫爵以從夫具  
官某故曾祖母某氏先正令妻元臣王母宜家宜室致  
門戶之方興如山如河想德容之甚盛丕昭壺範庸拓  
沐封於戲顏如舜英慨浮榮之易落書藏金匱尚令聞  
之無窮惟爾淑靈服茲休命可

故祖父布拉吉達贈推誠保德定遠功臣太尉

開府儀同三司上柱國追封歸德王謚忠武

制

立身揚名嘉元臣之盡孝報本反始原祖德之自來乃  
備哀榮肆頒命數具官某故祖父某生為名將蚤事太  
宗効忠於憲皇授鉞之時迄平欽察宣力於定廟帥師  
之日適有中原從世祖當潛見之初扈王旅征西南之  
國駐點蒼下大理言聽計從拔善闡平雲南師武臣力  
旋有征南之役俾代親王而行天不憖遺衆所嗟惜觀  
我家成大一統之業皆累朝有不二心之臣流慶本支

金方... 卷三  
為今柱石是用表勲作謚掌武視儀聿作國楨肇開王  
爵備密章之異渥慰泉壤之遺忠於戲一門萬石之家  
益益修於孝謹四世五公之盛尚永篤於忠貞佑爾後  
人欽予寵命可

故祖母額森氏追封歸德王夫人制

雲臺麟閣越在昔之造邦翟弟朱幘盍從夫而有爵載  
揚卹典庸備追榮具官某故祖母某氏名闕姬姜能臣  
伉儷柔嘉維則既正位於室家儆戒相成迄流芳於彛

鼎宜具象服行以脂田於戲五稔詩存無復平生之閔  
六珈儀盛猶當永世之傳歌此明綸安於顯祐可

故父穆爾呼察贈推忠佐理同德功臣太師開

府儀同三司上柱國追封歸德王謚忠貞制

盡忠之士雖死猶生積善之家其後必大睠予良弼慶  
自前人具官某故父某智勇而靖深雄毅而明敏左右  
世祖平定雲南旋扈聖於武昌入與謀於家國維時中  
統討叛濟南攻城每拔槩以先登對壘嘗最創而出陣

方王旅藉虎臣之力而將軍遺馬革之屍莫贖其身式  
開厥後茲用顯庸賜謚超爵分封躋三事以經邦表一  
柱而開府追榮身後式慰孝思於戲龍虎風雲東國嘉  
象賢之嗣山河帶礪剖符峻異姓之王益闡幽光永垂  
來裔可

故母蘇爾台氏追封歸德王夫人制

忠於君孝於親既極報崇之典正乎外位乎內宜旌伉  
儷之賢是生偉人爰立作相盍疏湯沐以重烝嘗具官

某故母某氏琬琰自將筭筭素謹身閑內則蚤積順於  
閨門慶衍後人寢陞華於宰輔茲用從封茅土光賁幽  
扃慰報本之深思勵教忠之大義於戲孰不美副珈之  
飾生也有涯庶幾安列鼎之歆沒而不朽可

故丞相和拉布哈贈

闕

功臣太師開府

儀同三司上柱國追封歸德王謚忠獻制

皇皇帝業念祖宗創始之難翼翼世臣備國家報功之  
典故具官某奮由閭閻勇赴勲名相我世皇時維中統

省臺院寺詳酌古以建官文物典章新造邦之立政致規模之宏遠備左右之勤勞胡不百年可為一概茲用王之大國位以太師既晉陟於階勲復兼崇其謚號以彰舊德以勵羣工於戲異姓封王命數蔑以加矣長富與貴忠孝所以守之尚迪後人欽承休命可

故妻某氏追封歸德王夫人制

念舊追榮朕所以王異姓抗尊齊體邦稱曰君夫人爰均國恩俾從夫爵故具官某故妻某氏必有令德乃媿

元臣朝廷有儀諒閨門之有度仁義相接亦夙夜之相  
成何間幽明益崇命數於戲夫夫婦婦澤既被於重泉  
君君臣臣義當明於奕世淑靈不昧寵命其歆可

故知樞密院事達勒達哈贈効誠正義安遠功

臣某官追封某謚某制

洪惟皇祖於鑠武功厥有禦侮之臣備著捍邊之績用  
疏卹典式表殊恩故具官某起自世家奮為名將前無  
堅敵既累奏於膚公願為忠臣遂益堅於大節究觀終

始盍備哀榮賜謚表勲增秩超爵於戲國家之恩侔天地無間顯幽君臣之義昭日星惟殫忠孝尚迪來裔欽承寵嘉可

故妻某氏追封某夫人制

嘉我世臣已備報崇之典閔其君子亦惟伉儷之賢爵俾從夫恩昭追遠故具官某故妻某氏篤生華閥作媿高閥宜于而家豈但矜其車甲勸之以義諒不廢於君臣迄致良人終為名將載嘉懿範爰畀愍章誕啓新封

以光窳窳於戲萬鍾五鼎惜無偕老之年副筭六珈祭  
以如生之禮尚惟不昧欽此來歆可

故中書右丞相達爾罕哈喇哈遜故曾祖父達  
爾罕奇吉里贈推忠佐命宣力功臣太師開  
府儀同三司上柱國追封順德王謚忠武制

觀宰相繫年之表近閔良臣慕帝王有真而來遠思乃  
祖爰稽卹典誕播明綸故具官某故曾祖父某卓識超  
羣沉幾先物我太祖當在潛之際怯烈氏有害正之謀

聞姦宄刻期而肆克乃晝夜間行而上變我故有備彼  
乃成擒方涼土之未臣帥師克夏出金人之不意反旆  
平燕惟此有不二心之臣是以成大一統之業澤流孫  
子世篤忠貞嗟宰木之成陰盍分茅而列壤是用秩啟  
三公之貴爵超五等之崇節惠易名表勛錫號於戲風  
雲龍虎尚想見於當時帶礪山河期有光於奕世英靈  
如在寵命其歆可

故曾祖母喀爾沁氏追封順德王夫人制

勛莫大於造國念昔先臣爵所貴於從夫昭茲懿範爰  
申贈典以既朕心故具官某故曾祖母某氏生有淑姿  
長諧嘉偶室家閔君子諒每戒於懷安食漿迎王師故  
首明於歸往足光內則盡列世封於乎通籍禁中惜音  
容之已遠題碑墓上庶名譽之俱傳歎此異恩昌于後  
裔可

故祖父達爾罕博囉齊贈叶忠翊亮定遠功臣  
太師開府儀同三司上柱國追封順德王謚

忠毅制

皇皇帝業念開國之元勛翼翼世臣嘉象賢之有子身  
亡而功固在骨朽而名如新爰著贊書式隆卹典故具  
官某故祖父某惟昔厥考乃心先朝義固有於君臣情  
實均於父子策勛盟府推第一之蕭何為將世家亦無  
雙之李廣延賞作千夫之長平金收屢戰之功迨及賢  
孫蔚為名相瞻言先正有慨予衷是用儀視公台封開  
王爵表宗勛而錫號節二惠以易名於呼功加於時澤

乃垂於後嗣世濟其美名勿墜於前人尚爾有知服我  
休命可

故祖母旺扎勒岱爾氏追封順德王夫人制

考德必論其世者欲浚忠厚之源列爵必從其夫者以  
著貞順之效伉儷之重褒卹是宜故具官某故祖母某  
氏靜柔其德淑慎爾儀夫既象其父賢汝亦稱其家婦  
誕敷漏澤光賁幽扃於呼異姓封王蓋以勛勞之舊父  
業傳子勉旃忠義之家尚爾淑靈歆予寵命可

故父達爾罕囊嘉岱贈宣忠孝節保大功臣太  
傅開府儀同三司上柱國追封順德王謚忠

懲制

事君致身克紹前人之烈生子似父聿為名相之家萃  
忠孝於一門歷祖孫而五世載敷異渥光賁重泉故具  
官某故父某沉深善謀果毅冠世蚤從憲廟有事西川  
轉戰無前既累奏駿功之捷忘身臨難不幸遺馬革之  
屍世憐死事之忠天厚積善之慶成季之勛未泯紀于

太常西平之子復賢光于奕世是用爵躋極品號表崇  
勛既視秩於三公復易名於二惠以旌大節以勵羣工  
嗚呼既死無復生惟榮名之不朽盛德必有報在爾後  
之能承國有異恩朕之篤意可

故母托遜哈納氏追封順德王夫人制

光榮累世瞻我忠臣之門赫奕殊恩顯爾夫人之德維  
茲之澤實自其原故具官某故母某氏慈順可貞靜嘉  
有則良人節義必是妻能勸其夫後嗣忠賢非是母曷

生是子爵至王而極矣國之禮亦宜之於呼如山如河  
既追錫小君之號宜家宜室實有開奕世之祥益衍慶  
源永垂來裔可

御史中丞托歡母旺扎勒氏封順德王太夫人制  
車服之繫是夫者妻之道身名之顯其母者子之賢肇  
錫嘉名有光世閥具官某母某氏篤生賢嗣世我良臣  
致忠孝之有傳亦保懷之能教是用因先王爵稱太夫  
人於呼召虎旬宣惟召公而是似魯侯燕喜壽魯母以

攸宜欽我寵章受茲介福可

皇太后故曾祖父追封濟寧王謚忠武阿齊諾  
延濟勒追封魯王仍謚忠武制

洪惟壽母用宏濟于艱難肆朕眇躬獲丕承于上下推  
毓慶兩朝之本宜追崇四世之親尊號皇太后故曾祖  
父追封某王某天挺英豪世積忠厚服勤太祖奄有庶  
邦逮事世皇遂為懿戚惟當今之聖善皆先世之冲和  
雖已啓於王封猶未蔽于朕志庸加異數改錫大邦仍

忠武之嘉名備哀榮之盛典於呼黃河如帶泰山如礪  
國其永存新甫之拓祖徠之松廟斯孔碩尚歆景命允  
建外家可

故曾祖母某氏追封魯忠武王妃制

世為后族實顯有功夫乃婦天故從其爵式衍東朝之  
慶益䟽戚里之封尊號皇太后故曾祖母某氏德為母  
儀言為內則風化素彰於閨壺祚胤乃正于家邦是生  
吾母之慈大受天下之養茲用貴其象服昨以龜蒙庸

昭泉壤之榮以副宮闈之望於呼賢如明德惜馬氏之  
未王福萃太任底周南之美化尚其幽懿服我休嘉可

開府儀同三司知樞密院事額森特穆爾故曾祖  
父嘉木和爾贈純誠保德翊戴功臣太尉開  
府儀同三司上柱國追封泰安王謚武毅制

維師若尚父載嘉繼志述事之賢修法有魯僖爰舉崇  
德報功之典誕敷愍澤光賁幽扃具官某故曾祖父某  
慷慨激昂果毅沈鷺東征西伐必斬將以搴旗左翼右

金史卷之三十一  
卷三  
張實亡身而許國惟太祖之神聖識名臣之子孫用集  
殊勛大開厥後是用表東岱而賜履超五等而追王既  
錫嘉名復頒渙號於呼故國非謂喬木丕勞爾先孝子  
必出忠臣永垂後裔英靈不昧休命其承可

故曾祖母翁吉喇特珍氏追封泰安王夫人制  
為婦配名世之家必有令德封王受曾孫之慶是豈常  
恩爰泝淵源式隆命數具官某故曾祖母某氏貞靜著  
于閨相孝儉儀于族嫻夫子無回顧之憂尊章有善事

之譽立功者成其業為國者忘其家維爾之賢克正乎  
內是以弼亮至于四世忠孝萃于一門俾從列爵之封  
庸表為善之報嗚呼茫茫我土亦曰安若泰山蟄蟄爾  
孫尚惟生此王國眷焉幽懿歆此明嘉可

故祖父蘇爾呼圖克贈推誠宣力佐運功臣太尉

開府儀同三司上柱國追封泰安王謚忠定

制

有大勛勞必世享其祿位追榮典冊宜先逮其祖宗睠

惟閹閹之家可後寵章之卹具官某故祖父某謀而能  
斷勇而不矜專摧陷廓清之功而弗居備險阻艱難之  
嘗而弗挫迷乃祖帷幄之寄啓厥子柱石之隆至于孫  
而益昌皆其德之未艾是用泰岳中土也以為爾邦王  
章大名也以為爾爵申以嘉號備其異恩嗚呼慨念先  
朝可謂得人之盛尚迪爾後亦克惟朕之承與國同休  
其命弗替可

故祖母唐古珍氏追封泰安王夫人制

婦之爵從其夫古今之達道祖之榮及其妣國家之至  
恩既積顯庸宜臻異數具官某故祖母某氏謹身節用  
婉德娠賢家門增盛大之基朝守獲忠良之佐上不墜  
于祖訓下益衍於後人所謂世臣亦惟爾敬是用分茅  
泰岳襲爵真封永以王夫人之稱配食忠定君之廟嗚  
呼魚軒翟茀何殊貴盛於當年瑜珥瑤環尚迪子孫於  
百世幽靈不昧休命其歆可

故父某官贈推忠宣力贊運功臣太傅開府儀

同三司上柱國追封泰安郡王謚武穆博爾  
歡加贈推忠宣力贊運功臣太師開府儀同  
三司上柱國追封泰安王仍謚武穆制

開國承家惟克篤於前烈定功行賞以啓佑於後人爰  
備哀榮庸嘉忠蓋具官某故父某官贈某官某勇智侶  
乎祖父勲業冠乎朝廷在世祖成宗之時備出將入相  
之績誓師南指淮海來歸轉饒西征闕隴晏卧降王斬  
帥絕施勞伐善之言執法秉鈞得憂國愛民之體上既

委以心腹爾亦竭其股肱蔚為名臣載在史氏雖已加  
乎寵命猶未愜於朕心是用節惠表勛錫爵啓土追恩  
既往垂勸方來嗚呼天有柱地有維不愆一老河如帶  
山如礪其永世王禰廟有光朕命無斃可

故母追封泰安郡王夫人克呼展氏加追封泰  
安王夫人制

夫得賢婦子有賢母惟家之隆生違至養死獲至恩斯  
善之報爰䟽異渥庸表幽局具官某故母追封某夫人

某氏柔順利貞恭儉節用以爾茂族相我元臣立非常之功有無窮之間篤生令子復列中朝襲數世之勛勞保一家之忠厚是用錫河岳之履為湯沐之封以示寵綏式昭愍卹嗚呼木欲靜而風不止嘗聞孝子之悲源之深者流必長尚衍後人之慶眷惟魂爽服此休嘉可

母扎拉展氏封泰安王夫人制

報功者君之仁顯親者子之志用章孝治誕布明綸具官某母某氏育林下風蔚閨中秀婉德元老宜于而家

教子義方利於吾國兼為婦為母之懿備從夫從子之  
榮是用錫之山川隆其命數貽世閨範稱君夫人於戲  
象服是宜雖君子不能偕老正位乎內而家人見為利  
貞益介壽祺茂對休命可

雪樓集卷三